

每週經課朗誦經文(巴克禮漢羅/教羅)2014/06/01

共同經課 - 1 使徒行傳一章六節~十四節

6 Án-ni in 聚集 ê 時，問伊，講，主 ah，你 tī chit 時 beh 將國復到 hō 以色列 mah？7 伊就 kā in 講，父所 hō tī 伊家已權內 ê 時 kap 期 m̄ 是 lín 所 thang 知。8 獨獨聖神臨到 lín ê 時，lín beh 得 tiòh 才能；koh tī 耶路撒冷，遍猶太，kap 撒馬利亞，直到地極，beh 做我 ê 干證。9 Chiah-ê 話講了，in teh 看 ê 時，耶穌受舉起上天；有雲 chih 接伊，in 就看 boē 見。10 伊去 ê 時，in òng 天注目看，忽然有兩人穿白衫，khia tī 身邊；11 講，加利利人 ah，啥事 khia-teh 看天？Chit-ê 耶穌離別 lín 受 chih 接上天，lín 看伊 án-ni 上天，伊亦 beh 照 án-ni 來。12 Hit 時 in tui hit-ê 名叫橄欖 ê 山 tò 去耶路撒冷，chit-ê 山近耶路撒冷，相離開有安歇日 ê 路站。13 已經入，就上 in 所 toà ê 樓頂；有彼得、約翰、雅各、安得烈、腓力 kap 多馬，Pa-to-lô-mái kap 馬太，A-lèk-hui ê kiáⁿ 雅各 kap Se-lô-tí ê 西門，kap 雅各 ê kiáⁿ 猶大。14 Chiah-ê 人，kap kúi-nā 個婦人，以及耶穌 ê 老母馬利亞，chham 伊 ê 兄弟，lóng 同心專務祈禱。

共同經課 - 2 詩篇六十八篇一節~十節，三十二節~三十五節

1 大衛 e 詩歌；交 hō 樂官。1) 願上帝起來，hō 伊 e 對敵四散；Hō 怨恨伊 e 人，tùi 伊 e 面前逃走。2 你 kā in 趕散，親像煙受吹散；Pháiⁿ 人見 tiòh 上帝 e 面就消滅；親像蠟見 tiòh 火就熔去。3 總是義人 beh 歡喜，in tī 上帝 e 面前 beh 快樂；In 亦 beh 歡歡喜喜。4 Lín tiòh 對上帝吟詩，唱歌 o-ló 伊 e 名；為 tiòh hit-ê 坐車經過曠野 e，修造大路；伊 e 名是耶和華。Tiòh tī 伊 e 面前快樂。5 上帝 tī 伊聖 e 所在，做孤兒 e 父；做寡婦 e 伸冤 e。6 上帝 hō 孤單 e 人有家；Hō 受關監 e 人出來享福；獨獨悖逆 e 人 tiàm tī 乾燥 e 地。7 上帝 ah，早你行 tī 百姓 e 頭前，經過曠野；[Sè-láh]8 Hit 時地見 tiòh 上帝 e 面就振動，天亦落雨；Hit-ê 西奈也振動，是見 tiòh 上帝，以色列 e 上帝 e 面。9 上帝 ah，你落大雨，你 e 產業以色列厭倦 e 時，你 hō 伊堅固。10 你 e 會眾 tiàm tī hit 中間；上帝 ah，你為 tiòh sòng-hiong 人備辦恩惠。32 世上 e 列國 ah，lín tiòh 對上帝唱歌，願 lín 吟詩 o-ló 主。[Sè-láh]33 就是 o-ló hit-ê 坐 tī tui kó-早就有，極高 e 天 ê 主。伊發出伊 e 聲，就是極大 e 聲。34 Lín tiòh 將權能歸 hō 上帝；伊 e 威嚴 tī 以色列 e 頂面，伊 e 權能是 tī 穹蒼。35 上帝 ah，你 tùi 你聖 e 所在真正 thang 驚；以色列 e 上帝是 hit-ê 將氣力權能賞賜伊 e 百姓 e，上帝是應該 o-ló e。

共同經課 - 3 彼得前書四章十二節~十四節，五章六節~十一節

12 所疼 ê 兄弟 ah，tī lín 中間所有親像火 ê 試煉，m̄-thang 奇怪伊，ná 親像 tú-tiòh 非常 ê 事；13 獨獨 tiòh 因為有份 tī 基督 ê 艱苦來歡喜；hō lín 也 tī 伊榮光顯現 ê 時歡喜快樂。14 Lín 為 tiòh 基督 ê 名 hō 人罵，有福氣；因為榮光 ê 神就是上帝 ê 神，安歇 tī lín。6 所以 tiòh 家已謙卑 tī 上帝大氣力 ê 手下，hō 伊到時高升 lín；7 lín 用凡所掛慮 ê 交付伊，因為伊關心 tī lín。8 Tiòh 節制，tiòh 警醒；lín ê 對敵就是魔鬼，親像哮 ê 獅，四界行，teh chhē 所 thang 吞食 ê；9 lín tui 信堅固 tiòh 抵擋伊，知 lín 眾兄弟 tī 世間也經過 chit 樣 ê 苦難。10 Koh 萬項恩典 ê 上帝，就是 bat tī 基督召 lín 得 tiòh 伊永遠 ê 榮光 ê，tī lín 暫時受苦 ê 了後，家已 beh hō lín 齊全、堅固、勇健。11 權能歸伊到代代。À-bēng。

共同經課 - 4 約翰福音十七章一節~十一節

1 耶穌講 chiah-ê，就 kiáh 目 òng 天，講，父 ah，時到 lah；願你榮光你 ê Kiáⁿ，thang hō Kiáⁿ 榮光你；2 親像你 bat hō Kiáⁿ 有權治理見有肉體 ê，beh hō 伊將永活賞賜見若你所 hō 伊 ê 人。3 Chit-ê 永活，就是 bat 你獨一真 ê 上帝，kap 你所差 ê 耶穌基督。4 我已經榮光你 tī 地上；就是你所交代我行 ê 工，我已經成伊。5 父 ah，taⁿ tiòh hō 我 kap 你 saⁿ-kap 有榮光，就是 bē 有世間以前我 kap 你 saⁿ-kap 有 ê 榮光。6 你所賞賜我出 tī 世間 ê 人，我已經用你 ê 名對 in 顯明；in 本是你 ê，你用 in 賞賜我；in 亦已經守你 ê 道理。7 Taⁿ in 知見若你所 hō 我 ê，lóng 是 tui 你來；8 因為你所 hō 我 ê 話，我已經 hō in；in 承受伊，亦確實知我對你出，koh 信你差我。9 我為 tiòh in 求；m̄ 是為 tiòh 世間求，就是為 tiòh 你所 hō 我 ê 人；因為 in 是你 ê。10 見若我 ê，就是你 ê；你 ê，就是我 ê；koh 我 tī in 有得 tiòh 榮光。11 Taⁿ 了後，我無 tī 世間；in tī 世間，我歸 tī 你。聖 ê 父 ah，願你 tī 你 ê 名，就是你所 hō 我 ê，來保守 in，hō in 做一個，親像咱一樣。